

Intrò li cai di X, e lexè certi avisi, è di Sacardo di Sonzim, è in Campo *etc.*

Da poi disnar fo pregadi, et ordinà Consejo di X per acceptar un zentilomo in pregadi vol imprestar ducati 1000.

Fo leto in Colegio, poi reduti, una lettera di 15, di Mantoa, di uno scrive a fra' Hieronimo heremita, dice è stato in Campo a Vicenza et parlato col principe di Analt, et nomina Zuan Francesco Dascole è li, e che uno signor li ha dito aver praticata con molti dil nostro Campo, e nominato Zuan Batista da Fam qual vol andar dal canto di la, e che assa' altri capi hanno questa tal intelligentia. Et consultato, fo terminato mandar l' aviso sollo di Zuan Batista da Fam, scrivendoli che nol credemo, *tamen* li avisemo secretamente.

297 Veneno in pregadi di li 13 zentilomeui che àno prestato li ducati 1000 per uno, zoè numero 10; non vene sier Jacomo Donado et sier Nicolò Gusioni et sier Francesco Foscarini.

Fu posto, per li savij dil Consejo e terra ferma, dar a domino Zuan Paulo Manfron tra lui e il fiol homeni d' arme 150, che prima ne havia 125 in tutto, e per il suo piato habbi a l' anno ducati 500; et sia mandato ai provedadori zenerali ducati 700 che con li 300 auti sono 1000, acciò atendi a impir la soa compagnia di homeni d' arme che li manchano. Ave 10 di no.

Fu posto, per li diti, condur Chiriacho dal Borgo con fanti 500 et ducati 30 al mexe per la sua persona, qual è sta aricordato per dito Zuan Paulo Manfron; et fu presa.

Fu posto, per li diti, conzar la parte di quelli pagano la meza tansa ultima, che habino quel don, qualli seconterano di l' imprestado e di arzenti e di contadi come hanno auto le do' dexime prese *etc.*; et fu presa.

Fu posto, per li diti e nui ai ordèni, una lettera a sier Antonio da Pexaro governador in Andre, che mandì di qui ducati 300 di l' intrade di quella ixola per il primo seguro pasazo, et questo perchè fo sententiato per sier Hieronimo Contarini *olim* provedador di l' armada, che quel signor che fo privato dil dominio, havesse a l' anno di la dita ixola ducati 100 per il suo viver, qual è sta sovenuto di danari di la Signoria nostra, e debbi mandar il conto di le intrate e la dispensation con il resto di danari da poter dar a chi *de jure* aspeta. *Item*, lui governador *de cætero* haver debbi *solum* ducati 250 a l' anno netti. *Item*, la cognition di la causa sia comessa a le do' quarantie, atento il pregadi è occupato, in le qual

habino ad esser quelli vechi fono deputadi. Et nui ai ordèni metesemo elezer il primo Consejo di pregadi, governador in Andre, per scurtinio, con ducati 250, et uno castelan per la bancha, e do man di election con ducati 200; et perchè la causa si dia expedir presto, si tolessemò zoso di far governador ni castelan, e andò prima parte. Fo presa.

Fu posto, per nui, certa parte di una dona, so marito era su la galia di sier Vicenzo da Riva quando si otene Fiume e fu morto, che l' habi ducati 25 a l' anno, a Corfù, in vita sua, di provision, *ut in parte*: 136 di si.

Fu posto, per nui, certa parte di uno portava za più anni lettere a Constantinopoli, qual li fo dà certo teren a Corfù dove potesse far uno botigin, per sier Beneto da Pexaro *olim* capitano zeneral, perhò li sia concesso *ut supra*: 106 di si.

Fu posto, per sier Vido Antonio Trivixan, sier Lorenzo Orio dotor e sier Piero Morexini, certa provision a Antonello Varda da Corfù, et io e sier Faustin Barbo volemo de più, con la condition tegni do cavalli et vadi soracomito, come fu preso per Colegio, et siali deputà provisione a la camera di Candia al mexe ducati 12 *ut in parte*. Or d' acordo andò una parte 297 *
solla, et ave . . . di no, et fu presa.

Fu posto, per i savij a ter a ferma, certa parte di uno ciprioto è sta in Campo et à servito, et perhò sia absolto dil bando havea *ut in parte*, et fu preso.

Et licentiato il pregadi restò Consejo di X con la zonta di danari, et fo acceptà in pregadi con il modo di altri, sier Jacomo Morexini *quondam* sier Carlo, et vene queste lettere:

Di Campo, di provedadori zenerali, date a le Brentelle, ozi a hore 13. Chome hessendo restà domino Zuan Paulo Manfron a la montagna de Rovolon aspetando fra' Lunardo ch' è a Moncelese, essi provedadori aveno lettere in quella note di dito fra' Lunardo, di hore 4, qual le manda incluse, et el Campo nimicho esser a Pojana, ne ha artelarie grosse, et dovendo andar a Moncelese non sano a che modo; è stato esso provedador Gritti in Padoa col capitano zercha le fortification, li bisogna opere, non ze molini a suficientia *etc.* *Item*, tornò poi in Campo dito Manfron, dicendo la massa grossa dil Campo esser ozi a Barbaran, et cavali 2000 con uno batajon di fanti esser venuti verso Rovolon per trovarlo, e passono quelle aque, e lui visto non poteva resister, era ritrato, *tamen* non ha potuto, tanto che stati a le man in le Coaze, et è restato *solum* di nostri uno homo d' arme *etc.* *Item*, hanno ricevuto li ducati 5000, sollicita se ne mandì di li altri. Hanno dal conte